




唐會要

卷八十六至八十九



唐會要卷八十六

宋王溥

撰

奴婢

舊制凡反逆相坐沒其家為官奴婢

反逆家男女及奴婢沒官皆謂之官

奴婢男年十四已下者配司農十五已上者以其年長令遠京邑配嶺南為城奴也一免為番戶

再免為雜戶三免為良人皆因赦宥所及則免之

凡免皆因

恩言之得降一等二等或而入良人諸律令格式有言官戶者是番戶之總號非謂別有一色

武德五年安州刺史李大亮以破輔公祐功賜奴婢百人大亮謂曰汝輩多衣冠子女破亡至此吾亦何忍以

汝爲賤隸乎一一皆放還高祖聞而嗟賞更賜奴婢三十人

顯慶二年十二月勅放還奴婢爲良及部曲客女者聽之皆出家長手書長子已下連署仍經本屬申牒除附諸官奴婢年六十已上及廢疾者並免賤

永昌元年九月越王貞破諸家僮勝衣甲者千餘人於是制王公已下奴婢有數

如意元年四月十七日勅逆人家奴婢及緣坐等色入官者不須充尚食尚藥驅使

萬歲通天元年九月勅士庶家僮僕有驍勇者官酬主

並令討擊契丹時契丹首領李盡忠攻陷營州也

大足元年五月三日勅西北緣邊州縣不得畜突厥奴婢

景龍三年司農卿趙履溫奏請以隋代番戶子孫數千家沒爲官奴婢仍充賜口以給貴倖監察御史裴子餘以爲官戶承恩始爲番戶且今又是子孫不可抑之奏免之

天寶八載六月十八日勅京畿及諸郡百姓有先是給

使在私家驅使者限勅到五日內一切送付內侍省其中
有是南口及契券分明者各作限約定數驅使雖王
公之家不得過二十人其職事官一品不得過十二人
二品不得過十人三品不得過八人四品不得過六人
五品不得過四人京文武清官六品七品不得過二人
八品九品不得過一人其嗣郡王郡主縣主國夫人諸
縣君等請各依本品同職事及京清資官處分其有別
承恩賜不在此限其蔭家父祖先有者各依本蔭職減
比見任之半其南口請禁蜀蠻及五溪嶺南夷獠之類

大曆十四年五月詔曰邕府歲貢奴婢使其離父母之
鄉絕骨肉之戀非仁也宜罷之

其年八月都官奏伏準格式官奴婢諸司每年正月造
籍一通一通送尚書一通留本司并每年置簿點身團
貌然後關金倉部給衣糧又準格式官戶受有勳及入
老者並從良比來因循省司不立文案伏恐日月滋深
官戶逃散其受勳及入老者無定數伏請令諸司準式
造籍送省并孳生及死亡者每季申報庶憑勅會勅旨
宜並準式處分自今已後有違闕者委所司奏聞準法

科罪

元和四年閏三月勅嶺南黔中福建等道百姓雖處遐俗莫非吾民多罹掠奪之虞豈無親愛之戀緣公私掠賣奴婢宜令所在長吏切加捉搦并審細勘責委知非良人百姓乃許交關有違犯者準法處分

八年九月詔自嶺南諸道輒不得以良口餉遺販易及將諸處博易又有求利之徒以良口博馬並勅所在長吏嚴加捉搦如長吏不任勾當委御史臺訪察聞奏長慶元年三月平盧軍節度使薛平奏應有海賊詔掠

新羅良口將到當管登萊州界及緣海諸道賣爲奴婢者伏以新羅國雖是外夷常稟正朔朝貢不絕與內地無殊其百姓良口等常被海賊掠賣於理實難先有制敕禁斷緣當管久陷賊中承前不守法度自收復已來道路無阻遞相販鬻其弊尤深伏乞特降明勅起今已後緣海諸道應有上件賊詔賣新羅國良人等一切禁斷請所在觀察使嚴加捉搦如有違犯便準法斷勅旨宜依

三年正月新羅國使金杵弼進狀先蒙恩勅禁賣良口

使任從所適有老弱者栖栖無家多寄傍海村鄉願歸
無路伏乞牒諸道傍海州縣每有船次便賜任歸不令
州縣制約勅旨禁賣新羅尋有正勅所言如有漂寄固
合任歸宜委所在州縣切加勘會責審是本國百姓情
願歸者方得放回

寶曆二年十一月敕朝官及節度觀察使自今已後並
不許更置私白身驅使

太和二年十月勅嶺南福建桂管邕管安南等道百姓
禁斷掠買餉遺良口前後制勅處分重疊非不明白衛

中行李元志等雖云買致數實過多官各令本道施行
准元和四年閏三月五日及八年九月十八日勅文切
加約勒仍逐管各差判官奏當司應管諸司所有官戶
奴婢等據要典及令文有免賤從良條近年雖敕勅諸
司皆不爲論致有終身不霑恩澤今請諸司諸使各勘
官戶奴婢有廢疾及年近七十者請准各令處分其新
羅奴婢伏准長慶元年三月十一日勅應有海賊該掠
新羅良口將到緣海諸道賣爲奴婢並禁斷者雖有明
勅尚未止絕伏請申明前勅更下諸道切加禁止勅旨

唐會要
卷三
五
宜依

會昌五年四月中書門下奏天下諸寺奴婢江淮人數至多其間有寺已破廢全無僧衆奴婢旣無衣食皆自營生或聞洪潭管內人數倍一千人已下五百人已上處計必不少臣等商量且望各委本道觀察使差清強官與本州刺史縣令同點檢具見在口數及老弱嬰孩並須一一分析聞奏如先自營生及已輸納者亦別項分析深恐無良吏及富豪商人百姓綱維潛計會藏隱事須稍峻法令如有犯者便以奴婢計估當二十千已

上並處極法官人及衣冠奏聽進止如有入糾告便以奴婢充賞待勘知人數續具條流其京城委功德亦準此條流仍具數奏聞勅旨依奏

其年八月中書門下奏應天下廢寺放奴婢從良百姓者今聞有細口恐刺史已下官人及富豪衣冠商人百姓計會藏隱及量與錢物索取勅下後如有此色並仰首出却還父母如有依前隱蔽有人糾告官人已下遠販商人百姓並處極法其告事人每一口賞錢一百千便以官錢充給續徵所犯人填納勅旨宜依

六年二月勅山南江淮間寺家奴婢比來有勅釐革或有父母贖男女將歸歲月既深今却搜檢情非違勅事恐擾人如有此色勘檢有憑並宜不要進收自會昌元年以後者不在此限

大中五年二月勅邊上諸州鎮送到投來吐蕃回鶻奴婢等今後所司勘問了宜並配嶺外不得隸內地

九年閏四月二十三日勅嶺南諸州貨賣男女奸人乘之潛射其利今後無問公私土客一切禁斷若潛出券書暗過州縣所在搜獲以強盜論如以男女傭負與人

貴分口食任於當年立年限爲約不得將出外界

大順二年四月二十日勅天下州府及在京諸軍或因收擄百姓男女宜給內庫銀絹委兩軍收贖歸還父母其諸州府委本道觀察使取上供錢充贖不得壓良爲賤

道路

貞觀十四年七月三十日移五嶠道於莎柵復舊路

開元二十八年正月十三日令兩京道路並種果樹令殿中侍御史鄭審充使

唐會要 卷之
天寶三載五月京兆尹蕭炆奏請於要道築甬道載沙實之至於朝堂從之九月炆又奏廣之

七載四月河南尹齊澣奏於偃師縣東山下開驛路通孝義橋北坡義堂路也

廣德元年八月勅如聞諸軍及諸府皆於道路開鑿營種衢路隘窄行李有妨苟徇所資頗乖法理宜令諸道諸使及州府長吏卽差官巡檢各依舊路不得輒有耕種并所在橋路亦令隨要修葺

大曆八年七月勅諸道官路不得令有耕種及斫伐樹

木其有官處勾當填補

貞元七年八月商州刺史李西華請廣商山道又別開偏道以避水潦從商州西至藍田東抵內鄉七百餘里皆山阻行人苦之西華役功十餘萬修橋道起官舍舊時每至夏秋水盛阻山澗行旅不得濟者或數日糧絕無所求糴西華通山間道謂之偏路人不留滯行者爲便

太和二年二月鄭州刺史楊歸厚奏當州郭下管城不置在州城內使命往來出入非便伏請准汝州例驛路

唐書卷一百一十五
卷一百一十五
於城西勅旨宜依

其年定州奏當管白石嶺南路官驛險峻請移於易州西紫荆嶺路脩置從之

開成元年四月昭義節度使奏請開夷儀山路通太原晉州從之

大中三年十一月山南西道節度使鄭渥鳳翔節度使李玘等奏當道先隄勅新開文川谷路從靈泉驛至白雲驛共一十所並每驛側近置私客館一所其應緣什物糧料遞乘並作大專知官及橋道等開修制置畢其

斜谷路創置驛五所平州驛一所連雲驛一所松嶺驛一所靈谿驛一所鳳泉驛一所並已畢功訖勅旨蜀漢道古今欹危自羊腸九曲之盤入鳥道三巴之外雖限戎隔夷誠爲要害而勞人御馬常困險難鄭渥首創厥功李玘繼成巨績校兩路之遠近減十驛之途程人不告勞功已大就偃師開路祇爲通津桂陽列亭止於涿驛此則通千里之險峻便三川之往來實爲良能克當寄任宜依所奏仍付史館

四年六月中書門下奏山南西道新開路訪聞頗不便

人近有山水摧損橋閣使命停擁館驛蕭條縱遣重修必倍費力臣等今日延英面奏宣旨却令修斜谷舊路及館驛者臣等商量望詔封赦及鳳翔節度使觀察使令速點檢計料修置或緣館驛未畢使命未可經通其商旅及私行者任取穩便往來不得更有約勒勅旨依奏

其年八月山南節度使封敖奏當道先准詔令臣檢討却修置斜谷路者臣當時差軍將所由領官健人夫併力修置道路橋閣等去七月二十日畢功通過商旅驛

馬擔馱往來七月二十二日已具聞奏訖其館驛先多摧毀破壞併功修樹今並已畢臣已散牒緣路管界州縣及牒鳳翔劔南東西南川觀察使並令取八月十五日以後於斜谷路過使命謹具如前勅旨宜依仍付所司

街巷

開元十九年六月勅京洛兩都是惟帝宅街衢坊市固須修築城內不得穿掘爲窰燒造磚瓦其有公私修造不得於街巷穿坑取土

唐會要 卷三
廣德元年九月勅城內諸街衢勿令諸使及百姓輒有
種植

永泰二年正月十四日京兆尹黎幹奏京城諸街種植
大厯二年五月勅諸坊市街曲有侵街打墻接簷造舍
等先處分一切不許並令毀拆宜委李勉常加勾當如
有犯者科違勅罪兼須重罰其種樹栽植如聞並已滋
茂亦委李勉勾當處置不得使有斫伐致令死損並諸
橋道亦須勾當

貞元四年二月勅京城內莊宅使界諸街坊墻有破壞

宜令取兩稅錢和僱工匠修築不得科斂民戶

十二年官街樹缺所司植榆以補之京兆尹吳湊曰榆
非九衢之玩亟命易之以槐

太和五年七月左右巡使奏伏准令式及至德長慶年
中前後勅文非三品已上及坊內三絕不合輒向街開
門各逐便宜無所拘限因循既久約勒甚難或鼓未動
卽先開或夜已深猶未閉致使街司巡檢人力難周亦
令奸盜之徒易爲逃匿伏見諸司所有官宅多是雜賃
尤要整齊如非三絕者請勒坊內開門向街門戶悉令

閉塞請准前後除准令式各合開外一切築斷餘依其
月左街使奏伏見諸街舖近日多被雜人及百姓諸軍
諸使官健起造舍屋侵占禁街切慮停止奸人難爲分
別今除先有勅文百姓及諸街舖守捉官健等舍屋外
餘雜人及諸軍諸使官健舍屋並令除拆所冀禁街整
肅以絕奸民勅旨所拆侵街舍宜令三個月限移拆如
不礙勅文者仍委本街使看便宜處分

九年八月勅諸街添補樹並委左右街使栽種價折領
於京兆府仍限八月栽畢其分析聞奏

大中三年六月右巡使奏義成軍節度使韋讓前任宮
苑使日故違勅文于懷真坊西南角亭子西侵街造舍
九間勅旨韋讓侵街造舍頗越舊章宜令毀拆

橋梁

顯慶五年五月一日修洛水月堰舊都城洛水天津之
東有中橋及利涉橋以通行李

上元二年司農卿韋機始移中橋自立德坊西南置于
安衆坊之左南當長夏門街都人甚以爲便因廢利涉
橋所省畝計然每年洛水泛溢必漂損橋梁倦于繕葺

唐會要 卷三十三
內使李昭德始創意令所司改用石脚銳其前以分水
勢自是無漂損之患

初葺機橋單上大悅令于中橋南
刻一方石刻其年辰簡速之跡紀
黃絹之辭也

先天二年八月勅天津橋除命婦已外餘車不得令過
開元九年十二月九日增修蒲津橋緝以竹葦引以鐵
牛命兵部尚書張說刻石爲頌

十九年六月勅兩京城內諸橋及當城門街者並將作
修營餘州縣料理

二十年四月二十一日改造天津橋毀皇津橋合爲一

橋

天寶元年二月廣東都天津橋中橋石脚兩眼以便水
勢移斗門自承福東南抵毓財坊南百步

八載二月先是東京商人李秀昇於南市北架洛水造
石橋南北二百步募人施財鉅萬計自五年創其始至
是而畢

十載十一月河南尹裴迥請稅本府戶錢自龍門東山
抵天津橋東造石堰以禦水勢從之

大厯五年五月勅承前府縣並差百姓修理橋梁不逾

旬月卽被毀拆又更差勒修造百姓勞煩常以爲弊宜委左右街使勾當捉搦勿令違犯如歲月深久橋木爛壞要修理者左右街使與京兆府計會其事申報中書門下計料處置其坊市橋令當界修理諸橋街京兆府以當府利錢充修造

其年八月勅其坊市內有橋不問大小各仰本街當界共修仍令京兆府各差本界官及當坊市所由勾當每年限正月十五日內令畢如違百姓決二十仍勒依前令修文武官一切具名聞奏節級科貶如後續有破

壞仍令所由時看功用多少計定數修理不得輒剩料率及有隱欺

貞元元年正月勅宜令京兆府與金吾計會取城內諸街枯死槐樹充修灞澇等橋板木等用仍栽新樹充替

關市

武德九年八月十七日詔關梁之設襟要斯在義止懲奸無取苛暴近世拘刻禁禦滋章非所以綏安百姓懷來萬邦者也其潼關以東緣河諸關悉宜停廢其金銀綾絹等雜物依格不得出關者並不須禁

唐會要 卷三
天授二年七月九日勅其雍州已西安置潼關卽宜廢
省洛州南北面各置關

長安二年正月有司表請稅關市鳳閣舍人崔融上議
曰臣伏見有司稅關市事條不限工商但是行旅盡稅
者臣謹按周禮九賦其七曰關市之賦竊惟市縱繁雜
關通末游欲令此徒止抑所以咸增賦稅夫關市之稅
者惟歛出入之商賈不稅往來之行人今若不論商民
通取諸色事不師古法乃任情悠悠末世於何瞻仰又
四海之廣九州之雜關必據險路市必憑要津若乃富

商大賈豪宗惡少輕死重氣結黨連羣嗜鳴則彎弓睚
眦則挺劍小有失意且猶如此一旦變法定是相驚非
惟流逆齊民亦自擾亂殊俗求利雖切爲害方深而有
司上言不識大體徒欲益帑藏助軍國殊不知軍國益
擾帑藏愈空且如天下諸津舟航所聚洪舸巨艦千軸
萬艘交貨往還昧旦承日今若江津河口置鋪納稅稅
則檢覆覆則遲留此津纒過彼鋪復止非惟國家稅錢
更遭主司僦賂至如關市之稅史籍有文秦政以雄圖
武力捨之而不用也漢武以霸畧英才去之而勿取也

何則關爲詰暴之所市爲聚民之地稅市則民散稅關則暴興暴興則起異圖民散則懷不軌况澆風久扇變法爲難徒欲禁末遊規小利豈知失元默亂大倫乎古人有言王者藏於天下諸侯藏於百姓農夫藏於庾商賈藏於篋惟陛下詳之必若師興有費國儲多窘卽請倍算尚賈加斂平民如此則國保富強人免憂懼天下幸甚臣知其不可也

天寶二年十月勅如聞闖已西諸國興販往來不絕雖托以求利終交通外蕃因循頗久殊非穩便自今已後

一切禁斷仍委四鎮節度使及路次所由郡縣嚴加捉搦不得更有往來

乾元元年八月勅大散關宜依舊命鳳翔府收管

寶應元年九月勅駱谷金牛子午等路往來行客所將隨身器仗等今日以後除郎官御史諸州部統進奉事官任將器仗隨身自餘私客等皆須過所上具所將器仗色目然後放過如過所上不具所將器仗色目數者一切于守捉處勒留

元和九年五月豐州奏中受降城與靈州城接界請置

關從之

十二年二月時討淮蔡既久濟師十倍賊知其必屈每思竊發于中以緩師期故有折陵寢之戰燕芻藁之場流矢飛書往往不絕蓋關防之罪也及平淄青後簿書獲賞蒲潼關吏文案乃明吏卒取于賊而容其奸也

大中三年七月涇州節度使康季榮奏六月二十七日

收原州城及諸關

石門關驛巖關木峽關制勝關六盤關石峽關

其月邠寧監

軍小使張文銳奏當兵道兵馬今月十三日收蕭關

六年三月隴州防禦使薛遠奏伏奉正月二十六日詔

旨令臣築故關訖聞奏者伏以汧源西境切在故關昔有隄防殊無制置僻在重岡之上苟務高深今移要會之口實堪控扼舊絕泉井遠汲河流今則臨水挾山當川限谷危墻深塹克揚營壘之勢伏乞改為定戎關關吏鈐轄往來臣當界又有南由路亦是要衝舊有水關亦請准前扼捉去正月二十七日功今月十七日畢謹畫圖進上勅旨薛遠新置關城得其要害形于圖畫頗見公忠宜依所奏

貞觀元年十月勅五品以上不得入市

七年七月二十日廢州縣市印

顯慶二年十二月十九日洛州置北市隸太府寺

垂拱二年十二月勅三輔及四大都督并衝要當路及

四萬戶已上州市令并赤縣錄事並宜省補

天授三年四月十六日神都置西市尋廢至長安四年

十一月二十二日又置至開元十三年六月二十三日

又廢其口馬移入北市

長安元年十一月二十八日廢京中市至天寶八載十

月五日西京咸遠營置南市華清宮置北市

景龍元年十一月勅諸非州縣之所不得置市其市當

以午時擊鼓二百下而衆大會日入前七刻擊鉦三百

下散其州縣領務少處不欲設鉦鼓聽之車駕行幸處

卽於頓側立市官差一人權檢校市事其月兩京市諸

行自有止鋪者不得于鋪前更造偏鋪各聽用尋常一

樣偏廂諸行以濫物交易者沒官諸在市及人衆中相

驚動令擾亂者杖八十

開元二年閏三月勅諸錦綾雜縠繡織成紬絹絲犂牛

尾真珠金鐵並不得與諸蕃互市及將入蕃金鐵之物亦不得將度西北諸關

大曆八年七月勅京城內諸坊市門至秋成後宜令所由勾當修補

十四年七月令王公百官及天下長吏無得與人爭利先于揚州置邸肆貿易者罷之先是諸道節度觀察使以廣陵當南北大衝百貨所集多以軍儲貨販列置邸肆名托軍用實私其利息至是乃絕貞元以後京都多中官市物于廛肆謂之官市不持文牒口含勅命皆以

監估不中衣服絹帛雜紅紫之物倍高其估尺寸裂以酬價市之經商皆匿名深居陳列廛閉唯粗弱苦窳市後又強驅于禁中傾車乘輜輦已而酬以丈尺帛絹少不甘毆致血流者中人之出雖沽漿賣餅之家無不徹業塞門以伺其去蒼頭女奴輕車名馬惴惴衢巷得免捕為幸京師之人嗟愁叫闐訴闕則左右前後皆其人也

貞元十四年八月右金吾將校趙洽用岩並配流天德軍時屢有中官于京城市肆強買人間率用直百錢物

買人數千錢物仍索脚價及進奉門戶謂之官市是時
吳湊爲京兆尹數上言切爲條理無幾中貴人等奏云
百姓蒙官市存養頗獲厚利吳湊再論奏者湊之金吾
舊吏趙洽等獻計也故洽等坐焉湊代宗元舅早承恩
顧上卽位復寵遇之潔廉謹慎未嘗不以公忠之言匡
啟於上至是又以官市事懇論於上前事雖不從時論
歸美

二十一年二月赦文應緣官市並出正文帖依時價買
賣不得侵擾百姓

寶曆二年十月京兆尹劉栖楚奏術者數之妙苟利於
時必以救患伏以前度甚雨閉門得晴臣請今後每陰
雨五日卽令坊市閉北門以禳諸陰晴三日便令盡開
使啟閉有常永爲定式從之

開成五年十二月勅京夜市宜令禁斷

會昌二年四月勅舊課種桑比有勅命如能增數每歲
申聞近知並不遵行恣加剪伐列于塵市賣作薪蒸自
今委所由嚴切禁斷

六年七月勅如聞十六宅置官市已來稍苦于百姓成

弊既久須有改移自今已後所出市一物已上並依三
官直市不得令損刻百姓

大中二年九月勅比有無良之人于街市投匿名文書
及于箭上或旗旛縱為奸言以亂國法此後所由潛加
捉搦如獲此色使即焚瘞不得上聞

五年八月州縣職員令大都督府市令一人掌市內交
易禁察非為通判市事丞一人掌判市事佐一人史一

人師三人

掌分行檢察州縣市各令準此

其月勅中縣戶滿三千以上

置市令一人史二人其不滿三千戶以上者並不得置

市官若要路須置舊來交易繁者聽依三千戶法置仍
由省諸縣在州郭下並置市官又准戶部格式其市吏
壁師之徒聽于當州縣供官人市買

城郭

永徽五年十一月十一日和雇雍州夫四萬一千人修
京羅城郭三十日畢九門各施觀明德觀正門以工部
尚書閣立德為始

顯慶五年九月改東明門為賓耀門西明門為宣耀門
長壽元年九月神都改造文昌臺及造定鼎上東等城

唐會要 卷之五
門修築外郭並鳳閣侍郎李昭德所制時人以為能
開元十八年四月一日築京城九十日畢

二十三年七月勅兩京城皇城及諸門并助鋪及京城
守把捉兵之處有城墻若門樓舍屋破壞須修理者皆
與所司相知并量抽當處職掌衛士以漸修營若須登
高臨內卽聞奏之

二十八年都畿採訪使御史中丞張倚請整齊都城侵
街墻宇

天寶二年正月二十八日築神都羅城號曰金城

六載十二月二十一日築會昌城于湯所置百司及公
卿邸第

十二載十月十七日和雇華陰扶風馮翊三郡丁匠及
京城人夫一萬三千五百人築興慶宮城並起樓四千
九日畢

至德二載正月二十七日改丹鳳門爲明鳳門安化門
爲達禮門安上門爲先天門及坊名有安者悉改之尋
並却如故

建中元年五月築奉天城

四年十月上避難于奉天初術士桑道茂奏請城奉天
爲王者之居至是方驗

貞元八年新作元武門

九年二月詔復築鹽州城先是貞元三年城爲吐蕃所
壞自後塞外無保障犬戎入寇旣城之後邊患頓息

元和三年涇原節度使段佑請修臨涇城在涇州北八
十里以扼犬戎之衝詔從之

八年河東節度使張宏靖奏修古舜城從之

長慶四年三月夏州節度使李祐奏于塞外築烏延窟

州臨塞陰河陶子等五城以備蕃寇

太和元年四月鳳翔府築臨汧城于汧陽縣西北八十
里

會昌六年正月閑廡宮苑使奏苑內諸面苑子等門共
九十四所今伏緣大禮日近準例鑾駕赴郊廟後並請
鑰閉匙鑰各令進入候還宮日即便請却開應赴郊廟
一物已上請宣下事件前並須搬載出盡其留司官健
等令併支糧料鑾駕赴郊廟後不得出入勅旨依奏
咸通六年四月西州節度使牛勣奏于蠻界築新安城

邊戎州功畢時南詔蠻入寇姚鵠陳許大將顏復戍雋
州奏築二城其年秋六姓蠻攻邊戎州爲復所敗退去

唐會要卷八十七

宋

王

溥

撰

轉運鹽鐵總叙

皇朝自武德永徽以後姜行本薛大鼎褚朗皆以漕運
上言然未能通濟其後監察御史王師順運旨絳之粟
於河渭之間增置渭橋倉自師順始也

開元二年河南尹李傑爲水運使大興漕事

十八年宣州刺史裴耀卿上言請依舊法敖倉於河口
立輸場以受米置河陰縣及河陰栢崖集津三門倉鑿

唐會要 卷之
崖開山以車運數十里積於太原倉以利漕運上從之
拜耀卿江淮轉運使仍以鄭州刺史崔希逸河南少尹
蕭炅爲之副轉運鹽鐵之有副使自此始也耀卿主之
三年凡運六七百石省陸運之傭三千萬舊制東都合
嘉倉積江淮之米載以大輿運而西至於陝三百里率
兩斛計傭錢千此耀卿所省之數也明年耀卿拜侍中
而蕭炅代焉二十五年運米一百萬石二十九年陝郡
太守李齊物鑿三門山以通運關三門巔踰岩險之地
狎負索引艦昇於安流自齊物始也

天寶三載韋堅代蕭炅以滄水作廣運潭於望春之東
而藏舟焉是年楊釗以殿中侍御史爲水陸運使以代
韋堅先是米至京師或砂礫糠粃雜乎其間開元初詔
使揚擲而較其虛實揚擲之名自此始也

十四載八月詔水陸運宜停一年天寶以來楊國忠王
鉉皆兼重使以權天下故轉運之事自耀卿以降罕有
聞者

肅宗初第五琦始以錢穀得見請於江淮分置租庸使
市輕貨以濟軍食遂拜監察御史爲之使乾元元年加

度支郎中尋兼中丞爲鹽鐵使於是始立鹽鐵法就山海井竈收權其鹽立監院官吏其舊業戶泊浮人欲以鹽爲業者免其雜徭隸鹽鐵使盜煮私鹽罪有差亭戶自租庸以外無得橫賦人不益稅而國用以饒明年琦以戶部侍郎同平章事詔兵部侍郎呂誼代之寶應元年五月元載以中書侍郎代呂誼是時淮河阻兵飛輓路絕鹽鐵租賦皆泝漢而上以待御史穆寧爲河南道轉運租庸鹽鐵使尋加戶部員外遷鄂州刺催以總東南貢賦是時朝議以寇盜未戢關東漕運宜有倚辦遂

以通州刺史劉晏爲戶部侍郎京兆尹度支鹽鐵轉運使鹽鐵兼漕運自晏始也二年拜吏部尚書同平章事依前充使晏始以鹽利爲漕備自江淮至渭橋率十萬斛備七千緡補綱吏督之不發丁男不勞郡縣蓋自古未之有也至今爲法晏旣至江淮以書遺元載曰浮於淮泗達於汴入於河西經底柱硤石少華楚帆越客直抵建章長樂此安社稷之奇業也晏賓於東朝猶有官謗公終始故舊不信流言則賈誼復召宣室宏羊重興功利敢不悉力以答所知驅馬陝郊見三門渠津遺跡

到河陰鞏洛見宇文愷立梁公堰分河入渠及李傑新堤故事飾像河廟凜然如生步步探討知昔人用心則潭衡桂陽必多積穀可以淪波挂席西指長安三秦之人待此而飽六軍之衆待此而強天子無憂都人得悅四方旅拒者可以破膽三河流離者於茲請命公輔明主爲富民侯此今之切務不可失也僕願湔洗瑕穢一罄愚誠以副公之心且晏勤于官不辭水火然運之利與運之病各有四五焉晏自尹京入爲計相共五年矣京師三輔百姓唯苦稅畝傷多若使每年得江湖二三

斗萬石卽徭賦頓減歌舞皇澤其利一也東都殘毀百無一存若米運流通則饑民皆附村落邑廛從此滋多受命之日引海陵之倉衣食鞏洛是計之得者其利二也諸侯有在邊者諸戎有侵敗王畧者或聞三江五湖陳陳紅粒雲帆桂檝輸納帝鄉可以震耀夷夏其利三也自古帝王之盛皆云書同文車同軌日月所照莫不率俾今舟車旣通商賈來往百貨雜集航海梯山聖神光耀漸及貞觀永徽之盛其利四也所可疑者函陝凋殘東周尤甚過宜陽熊耳至武牢成臯五百里中編戶

千餘而已人烟蕭條獸游鬼哭輿必脫輻牛必羸角棧車輓輅亦不易求今於無人之境興勞人之運故難就矣其病一也汴流渾渾不脩則澱頃因寇難曾未疏決澤減水岸石墮役夫需於沙津吏旋於淤濘千里河上岡水行舟其病二也東垣底柱澠池二陵北河運處五六百里戍卒久絕奪攘奸宄窟穴囊乘夾河爲藪豺狼狺狺舟行所經寇亦能往其病三也東自淮陰西臨蒲坂亘三千里屯戍相望中軍皆鼎司元侯賤卒亦儀同青紫每云食半菽又云無挾纊輓漕所至船到便留卽

非單車使折簡書所能制矣其病四也是願畢其思慮奔走之惟中書詳其利病裁成之晏見一水不通願荷鋪先往見一粒不運願負米先趨焦心苦形期報明主丹誠未尅漕引多虞屏營中流掩泣獻狀自此每歲運米數十萬石自江淮北列置巡院搜擇能吏以主之廣牢盆以來商賈凡所制置皆自晏始廣德二年正月復以第五琦專判度支鑄錢鹽鐵事而晏以檢校戶部尚書爲河南及江淮以來轉運使及與河南副元帥計會開決汴河水永泰二年晏爲東道轉運常平鑄錢鹽鐵

使琦爲關內河東劍南三川轉運常平鑄錢鹽鐵使大
歷五年詔停關內河東三川轉運常平鹽鐵使自此晏
與戶部侍郎韓滉分領關內河東山南劍南租庸青苗
使至十四年天下財賦皆以晏掌之建中元年詔曰朕
以征稅多門郡邑凋耗聽於羣議思有變更將致時雍
宜遵古訓其江淮米準旨轉運入京者及諸軍糧儲宜
令庫部郎中崔河圖權領之今年夏稅以前諸道財賦
多輸京師者及鹽鐵財貨委江州刺史包佶權領之天
下錢穀皆歸金部倉部委中書門下簡兩司郎官準格

式條理尋貶晏爲忠州刺史晏旣罷黜天下錢穀歸尚
書省旣而出納無所統乃復置使領之是年三月以韓
洄爲戶部侍郎判度支金部郎中杜佑權勾當江淮水
陸運使行劉晏韓滉舊制先是晏爲宰臣楊炎所惡貶
忠州刺史尋殺於忠州兵興以來凶荒相屬京師斗斛
萬錢官厨無兼時之食百姓在畿甸者拔穀授穗以供
禁軍洄旣遺元載書陳轉稅米利病歲入米數十萬
斛以濟關中代第五琦鹽務法益精密初年入錢六十
萬季年則十倍其初大歷末通天下之財而計其所入

總一千二百萬貫而鹽利過半李靈耀之亂河南節度使據土不奉法賦稅不上供州縣益減晏以羨餘相補人不加賦所入仍舊議者稱之其商確商權財用之術者必一時之選故晏沒後二十餘年韓洄元琇裴腆包佶盧貞李衡相繼分掌財賦皆晏門下晏部吏在千里外奉教如目前四方水旱及軍府織芥莫不先知焉其年詔曰天下山澤之利當歸王者宜總隸鹽鐵使三年以包佶爲庶子汴東水陸運鹽鐵租庸使崔縱爲右庶子汴西水陸運鹽鐵租庸使四年度支侍郎趙贊議常

平事竹木茶漆盡稅茶之有稅肇于此矣

貞元元年元琇以御史大夫爲鹽鐵水陸運使其年七月以尚書右僕射韓滉統之滉沒宰相竇參代之

五年十二月度支轉運鹽鐵奏比年自揚子運米皆分配緣路觀察使差長綱發遣連路旣遠實爲勞民今請當使諸院自差綱節級搬運以救邊食從之

八年詔東南兩稅財賦自河南江淮嶺南山南東道至渭橋以戶部侍郎張滂主之河東劔南山南西道以戶部尚書度支使班宏主之今戶部所領三川鹽鐵轉運

自此始也其後宏滂互有短長宰相趙憬陸贄以其事
上聞由是遵大厯故事如劉晏韓滉所分焉

九年張滂奏立稅茶法郡國有茶山及商賈以茶爲利
者委院司分置諸場立三等時估爲價爲什一之稅是
歲得緡四十一萬茶之有稅自滂始也自後裴延齡專
判度支與鹽鐵益殊塗而理矣十年潤州刺史王緯代
之理于朱方數年而李錡代之鹽院津堰俱張侵剝不
知紀愷私路小堰厚斂行人多是錡始時鹽鐵轉運有
上都留後以副使潘孟陽主之王叔文權傾朝野亦以

鹽鐵副使兼學士爲留後故鹽鐵副使之俸至今獨優
順宗卽位有司重奏鹽法以杜佑判度支鹽鐵轉運使
治於揚州

元和二年三月以李巽代之先是李錡判使天下權酷
漕運由其操割專事貢獻牢其寵渥中朝秉事者悉以
利交鹽鐵之利積於私室而國用日耗巽旣爲鹽鐵使
大正其事其堰埭先隸浙西觀察使者悉歸之因循權
置者盡罷之增置河陰敖倉置桂陽監鑄平陽銅山爲
錢又奏江淮河南峽內兗鄆嶺南鹽法監院去年收鹽

價緡錢七百二十七萬比舊法張其估二千七百八十餘萬非實數也今請以其數除爲煮鹽之外付度支收其數鹽鐵使煮鹽利繫度支自此始也又以程昇爲揚子留後四年四月五日巽卒自權筦之興唯劉晏得其術而巽次之然初年之利類巽之季年季年之利則三倍於晏矣舊制每歲運江淮米五十萬斛至河陰留十萬四十萬送渭倉晏歿久不登其數惟巽掌使三載無升斗之缺焉六月以河東節度使李鄘代之五年鄘爲淮南節度使以宣州觀察使盧坦代之六年坦奏每年

江淮運糴米四十萬石到渭橋近日欠闕大半請旋收糴遞年貯備從之坦改戶部侍郎以京兆尹王播代之播遂奏元和五年江淮河南嶺南峽中兗鄆等鹽利錢六百九十八萬貫比量改法已前舊鹽利時價四倍虛估卽此錢當爲千七百四十餘萬貫矣請付度支收管從之其年詔曰兩稅法悉委郡國初極便人但緣約法之時不定物估今度支鹽鐵泉貨是司各有分巡置於都會爰命帖職周視四方簡而易從庶叶權便政有所弊事有所宜皆得舉聞副我憂寄以揚子鹽鐵留後爲

江淮已南兩稅使江陵留後爲荆衡漢沔東界彭蠡南
及日南兩稅使度支山南西道分巡院官充三川兩稅
使峽內煎鹽五監先屬鹽鐵使今宜割屬度支便委山
南西道兩稅使兼知糶賣峽內鹽屬度支自此始也
七年王播奏去年鹽利除割峽內并鹽收錢六百八十
五萬從實估也又奏商人於戶部度支鹽鐵三司飛錢
謂之便換

八年以崔俊爲揚子留後淮嶺已東兩稅使崔祝爲江
陵留後荆南已東兩稅使

十三年播又奏以軍興之時財用是切頃者劉晏領使
皆自案租庸至於州縣否臧錢穀利病之物虛實皆得
而知今臣守務在城不得自往請令臣副使程昇出巡
江淮具州府上供錢穀一切勘問從之閏五月昇至江
淮得錢一百八十五萬貫以進其年以播守禮部尚書
以衛尉卿程昇代之明年昇以本官兼御史大夫平章
事

十四年昇卒以刑部侍郎柳公綽代之長慶初王播復
代公綽四年王涯以戶部侍郎代播復以鹽鐵使爲揚

州節度使文宗卽位入覲以宰相判使其後王涯復判
二使表請使茶山之人移樹官場舊有貯積皆使焚棄
天下怨之九年以事誅而令狐楚以戶部尚書右僕射
主之以是年茶法大壞奏請付州縣而入其租於戶部
人人悅焉

開成元年李石以中書侍郎判收茶法復貞元之制也
三年以戶部尙書同平章事楊嗣復主之多革錢穀監
院之陳事至大中壬申凡十五年多任元臣以集其務
崔珙自刑部尚書拜杜悰以淮南節度使領之旣而皆
踐公台薛元賞李執方盧宏正馬植敬暉五人於九年
之中相踵理之植亦自是居相位

大中五年二月以戶部侍郎裴休爲鹽鐵轉運使明年
八月以本官平章事依前判使始者漕米歲四十萬斛
其能至渭倉者十不三四漕吏狡蠹敗溺百端官舟之
沉多者歲至七十餘隻緣河奸犯大紊晏法休使寮屬
按之委河次縣令董之自江津達渭以四十萬斛之備
計緡二十八萬悉使歸諸漕吏巡院胥吏無得侵牟與
之爲法凡十事奏之六年五月又立稅茶之法凡十二

條陳奏上大悅詔曰裴休興利除害深見奉公盡可其
奏由是三歲漕米至渭濱積一百二十萬斛無升合沈
棄焉

十年裴休出鎮澤潞尋以柳仲郢夏侯孜杜棕迭判之
至咸通五年南蠻攻安南府連歲用兵饋輓不集詔江
淮鹽鐵巡院和僱舟船運淮南浙西道米至安南乾符
中又以崔彥昭王凝判之二年凝以所補吏生賦改官
復命裴坦判之高駢爲潤州節度移鎮淮南亦就判使
務

中和元年黃巢犯闕車駕出狩興元府又以蕭遘韋昭
度判之及命侍中王鐸爲行營都統率諸道之兵收復
京城慮調發不時乃以昭度兼供運使至光啓中所在
征鎮自擅兵賦皆不上供歲時但貢奉而已由是江淮
轉運路絕國命所能制者唯河西山南劍南嶺南西道
洎宦官田令孜自蜀中扈從召募新軍號左右神策共
四十四部並南衙官屬僅萬餘三司轉無調發之所舊
日兩池權鹽稅課鹽鐵使特置鹽官以總其事自亂離
之後河東節度使王重榮兼領權務歲出課鹽三千車

以進至是令攷以軍食闕以乃舉黃明故事請以兩池
權務歸之鹽鐵詔下車榮上章論訴竟不能奪天復中
朱全忠兼鎮河中兩池鹽課始加至五十車自大順年
後又以孔緯杜讓能崔昭緯嗣薛王知柔徐彥若韓建
崔允裴慤柳璨相次判之

漕運

舊制凡陸行之馬程日七十里步及驢五十里車三十
里水行之程舟之重者沂河日三十里江四十里餘水
四十五里空舟沂河四十里江五十里餘水六十里沿

流之舟卽輕重同制河日一百五十里江一百里餘水
七十里其如底柱之類不拘此限若遇風水淺不得行
者卽於隨近官司中牒檢印記聽折半

武德八年十二月十八日水部郎中姜行本請於隴州
開五節堰引水通運許之

永徽元年薛大鼎爲滄州刺史界內有無棣河隋末真
廢大鼎奏開之引魚鹽於海百姓歌之曰新河得通舟
楫利直達滄海魚鹽至昔日徒行今騁駟美哉薛公德
滂被

唐會要 卷之三
顯慶元年十月苑面西監褚昀請開底柱三門鑿山架險擬通陸運於是發卒六千人鑿之一月而功畢後水漲引舟竟不能進

咸亨三年關中饑監察御史王師順奏請運晉絳州倉粟以贍之上委以漕運河渭之間舟楫相繼置倉於渭南東師順始之也

大足元年六月九日於東都立德坊南穿新潭安置諸州租船

神龍三年滄州刺史姜師度於薊州之北漲水爲溝以備契丹奚之入寇又約舊渠傍海穿漕號爲平虜渠以避海南運糧者至今賴焉

開元二年河南尹李傑奏汴州東有梁公堰年久堰破江淮漕運不通傑奉發汴鄭丁夫以濬之省功速就公私深以爲利刻石水濱以紀其績

九年五月二十五日勅水運米揚擲四五月米一斛欠五合三八月米一斛欠四合二九月米一斛欠三合正十十一月十二月米一斛欠二合並與納

十五年正月十二日令將作大匠范安及檢校鄭州河

口斗門先是洛陽人劉宗器上言請塞汜水舊汴河口于下流榮澤界開梁公堰置斗門以通淮汴擢拜宗器左衛率府胄曹至是新渠填塞行舟不通貶宗器爲循州安懷戍主安及遂發河南府懷鄭汴滑衛三萬人疏決開舊河口旬日而畢

二十年京師穀價踴起上召京兆尹裴耀卿問以救人之術耀卿奏曰昔貞觀永徽之際祿廩未廣每歲轉運不過二萬石便足今國用漸廣漕運數倍猶不能支從東都至陝河路艱險旣用陸運無由廣致若能開漕運

變陸爲水則有所盈餘動逾萬計且江南租船候水始進吳人不便漕輓由是所在停留日月旣淹遂生竊盜臣望於河口置一倉納河東租米便放船歸從河口卽分入河洛官自雇船載運至三門之東置一倉三門旣屬水險卽于河岸開山車運十數里至三門之西又置一倉每運置倉卽搬下貯納水道卽運水細便止自太原倉泝河入渭更無停留所省鉅萬前漢都關中年月稍久及隋亦在京師緣河皆有舊倉所以國用常贍上深然其言至二十二年八月十四日置河陰縣及河陰

倉河清縣置柏崖倉二門東置集津倉三門西置三門
倉開三門北山十八里以避湍險自江淮而泝鴻溝悉
納河陰倉自河陰送納含嘉倉又遞納太原倉所謂自北運
太原爲浮渭以實關中其有侍中裴耀卿充江淮轉運
使以鄭州刺史崔希逸河南少尹蕭炅爲副三年凡運
七百萬石省脚三十萬貫或說耀卿進所首却錢以表
其功答曰此並公事豈宜以小道邀名求寵也河陰上
倉天寶後廢至大曆四年戶部尚書劉晏奏置汴口倉
二十六年十一月五日潤州刺史齊澣奏常州北界隔

吳江至瓜步江爲限每船渡繞瓜步江沙尾紆廻六十
里多爲風濤所損臣請於京口埭下直截渡江二十里
開伊婁河二十五里卽運揚子縣無風水災又減租脚
錢歲收利百億又立伊婁埭皆官收其課迄今用之
二十八年九月魏州刺史盧暉開通濟渠自石灰窠引
流至州城西都注魏橋夾州製樓白餘間以貯江淮之
貨

二十九年十一月陝郡太守李齊物鑿三門上路通流
便於漕運開渠得古黎鑿三於石下皆有文曰平陸遂

改河北縣爲平陸縣至天寶元年正月二十五日渠成
放流其年陝郡太守韋堅奏引灞澇二水開廣運潭於
望春亭之東自華陰永豐倉以通河渭廣運潭渠旣成
至二年三月二十六日勅古之善政貴於足食欲求富
國必先利人朕以關輔之間尤資殷贍比來轉輸未免
艱辛故置此潭以通漕運萬世之利一朝而成其潭宜
以廣運爲名

其年京兆尹韓朝宗分渭水入自金光門置潭於西市
之西街以貯材木

永泰二年七月十日鑿運水渠自京兆府直東至薦福
寺東街至北國子監正東至於城東街正北又過景風
門延喜門入于苑澗八尺深丈餘京兆尹黎幹奏

貞元一年五月勅漕運通流國之大計其河水每至春
夏之時多被兩岸田萊盜開斗門舟船停滯職此之由
宜委汴宋等州觀察使選清強官專知分界勾當其鄭
州徐州泗州界各仰刺史準此處分仍令知汴州支遣
院官計會勾當

十五年二月于頔奏移轉運汴州院于河陰以汴州累

唐書卷之... 卷之...
遇兵亂失散錢帛故也

元和三年四月增置河陰倉屋一百五十間

十一年十二月始置淮潁水運場子等諸院米自淮陰
泝流至壽州四四十里入潁口又泝流至潁州沈邱界
五百里至于陳州項城又泝流五百里入于潑河又三
百里輸于鄆城得米五十萬石附之以芟一千五百萬
束計其功省汴運七萬六千貫

寶曆二年正月鹽鐵使王播奏揚州城內舊漕河水淺
舟船澀滯轉輸不及期程今從閶門外古七里港開河
向東屈曲取禪智寺橋東通舊官河計長一十九里其
功役所費當使自方圓支遣從之

咸通三年五月南蠻陷交趾徵諸道兵赴嶺南詔湖南
水運自湘江入潯渠並江西水運以饋行營諸軍湘潯
泝運功役艱難軍屯廣州乏食潤州人陳璠石詣闕上
書言江四湖南泝流運糧不濟軍期臣有奇計以饋南
軍帝召見因奏臣弟聽思昔曾任雷州刺史家人隨海
船至福建往來大船一隻可致千石自福建不一月至
廣州得船數十艘便可致三五萬石又引劉裕海路進

軍被盧循故事乃以礮石爲鹽鐵巡官往揚子縣專督海運于是軍不闕供

八年三月安南都護高駢奏安南至邕管水路湍險已令工人鑿去巨石漕船無滯詔褒美之

轉運使

開元二十一年八月侍中裴耀卿充江南淮南轉運使二十二年九月太府少卿蕭昚充江淮處置轉運使天寶二年四月陝郡太守韋堅加兼勾當緣河及江淮轉運使四載八月楊釗除殿中侍御史充水陸轉運使乾

元元年三月第五琦除度支郎中充諸色轉運使二年十二月兵部侍郎呂諲充勾當轉運使元年建子月戶部侍郎元載充江淮轉運使寶應元年六月二十八日戶部侍郎劉晏充勾當轉運使廣德二年正月戶部侍郎第五琦充諸道轉運使永泰元年正月劉晏充東畿淮南浙江東西湖南山南東道轉運使第五琦充畿關內河東劍南山南西道轉運使大厯四年三月劉晏除吏部尚書兼御史大夫充東都河南江淮山南東道轉運使建中二年十一月度支郎中杜佑兼御史中丞江

唐書卷一百一十五
淮水陸運使三年十二月二十日包佶除左庶子充汴
東水陸運使崔縱除右庶子充汴西水陸運使貞元元
年三月元琇加御史大夫充諸道水陸運使其年七月
尙書右僕射韓滉充江淮轉運使五年二月中書侍郎
竇參充諸道轉運使八年三月張滂除侍郎充諸道轉
運使十年十月潤州刺史王緯兼諸道轉運使十五年
十二月以浙西觀察使李錡充諸道轉運使永貞元年
以司空平章事杜佑再兼諸道轉運使元和元年四月
兵部侍郎李巽充諸道轉運使三年六月刑部尚書李

鄘充諸道轉運使五年十二月盧坦除刑部侍郎充諸
道轉運使六年四月刑部侍郎王播充諸道轉運使十
四年五月刑部侍郎柳公綽充諸道轉運使長慶元年
二月王播復爲刑部尚書充諸道轉運使四年四月王
涯爲戶部侍郎充諸道轉運使寶曆元年正月王播爲
淮南節度又充諸道轉運使太和九年十二月右僕射
令狐楚充諸道轉運使開成元年四月戶部尚書平章
事李石充諸道轉運使三年十月楊嗣復除戶部尚書
充諸道轉運使五年二月戶部尚書崔珙充諸道轉運

使會昌四年七月左僕射平章事杜棕充諸道轉運使
六年四月以大理卿馬植爲刑部侍郎充諸道轉運使
大中五年刑部侍郎裴休充諸道轉運使十一年兵部
侍郎柳仲郢充諸道轉運使十一年二月戶部侍郎夏
侯孜充諸道轉運使十四年尚書左僕射杜棕復充諸
道轉運使咸通五年十二月戶部侍郎劉鄴充諸道轉
運使六年十月兵部侍郎于琮充諸道轉運使乾符元
年二月崔彥昭爲兵部侍郎充諸道轉運使其年又以
兵部尙書王凝充諸道轉運使二年二月兵部侍郎裴

坦充諸道轉運使四年六月以宣歙觀察使高駢爲潤
州刺史充諸道轉運使六年移節淮南領使如故中和
元年兵部侍郎蕭邁充諸道轉運使其年中書侍郎平
章事韋昭度充諸道轉運使光啓二年三月刑部尙書
孔緯充諸道轉運使大順二年門下侍郎杜讓能充諸
道轉運使景福二年十一月吏部尙書平章事崔昭緯
充諸道轉運使乾寧二年京兆尹嗣薛王知柔爲戶部
尙書充諸道轉運使其年九月門下侍郎平章事徐彥
若充諸道轉運使光化三年八月左僕射平章事崔允

唐會要
充諸道轉運使天祐元年石僕射裴樞充諸道轉運使
其年門下侍郎平章事柳璨充諸道轉運使

河南水陸運使

開元二年閏二月陝郡刺史李傑除河南少尹充水陸
運使至三年九月畢構爲河南尹不帶水陸運使至天
寶三載十一月李齊物除河南尹又帶水陸運使貞元
十年二月河南尹齊抗充河南水陸運使至元和六年
十月勅河南水陸運使宜停

陝州水陸運使

先天二年十月李傑爲刺史充水陸運使自此始也己
後刺史常帶使天寶十載五月崔無諤除太守不帶水
陸運使度支使楊國忠奏請自勾當遂加國忠陝郡水
陸運使至十二載正月二十一日勅陝運使宜令陝郡
太守崔無諤充使楊國忠充都使勾當至貞元十三年
四月陝虢觀察使于頔兼陝州水陸運使至元和六年
十月勅陝州水陸運使宜停

開元十三年五月二十八日勅陝州水陸運使令別自
置印二十五年六月二十三日詔河南陝運兩使每年

常運一百八十萬石米送京近已減八十萬石今據太倉米數支計有餘其今年所運一百萬石亦宜停建中二年十二月停江淮水陸運使轉運事委度支處置三年八月分置汴東西水陸運使兩稅鹽鐵使貞元三年正月諸道水陸運使及度支巡院江淮轉運使並宜停

唐會要卷八十八

宋

王

溥

撰

鹽鐵

開元元年十二月河中尹姜師度以安邑鹽池漸涸開拓疏決水道置爲鹽屯公私大收其利其年十一月五日左拾遺劉彤論鹽鐵上表曰臣聞漢孝武爲政廢馬三十萬後宮數萬人外討戎夷內興宮室殫費之甚什百當今然而古費多而貨有餘今用少而財不足者何也豈非古取山澤而今取貧民哉取山澤則公利厚而

人歸于農取貧民則公利薄而人去其業故先王之作法也山海有官虞衡有職輕重有術禁發有時一則專農二則饒國濟民盛事也臣實爲當今宜之夫煮海爲鹽採山鑄錢伐木爲室豐餘之輩也寒而無衣飢而無食傭賃自資者窮苦之流也若能收山海厚利奪豐餘之人蠲調歛重徭免窮苦之子所謂損有餘而益不足帝王之道可不謂然乎然臣願陛下詔鹽鐵木等官各收其利買遷于人則不及數年府有餘儲矣然後下寬大之令蠲窮獨之徭可以惠羣生可以柔荒服雖戎狄

降服堯湯水旱無足虞也奉天適變惟在陛下行之上令宰臣議其可否咸以鹽鐵之利甚益國用遂令將作大匠姜師度戶部侍郎強循俱攝御史中丞與諸道按察使檢校海內鹽鐵之課至十年八月十日勅諸州所造鹽鐵每年合有官課比令使人勾當除此更無別求在外不細悉知如聞稍有侵尅宜令本州刺史上佐一人檢校依令式收稅如有落帳欺沒仍委按察糾覺奏聞其姜師度除蒲州鹽池以外自餘處更不須巡檢貞元十六年十二月史牟奏澤潞鄭等州冬食末鹽請

唐會要 卷之
一切禁斷從之

二十一年二月停鹽鐵使月進舊錢總悉入正軍以助經費而主此務者稍以時市珍玩時新物充進獻以求恩澤其後益甚歲進錢物謂之美餘而經入益少及貞元末遂月獻焉謂之月進及是而罷

元和二年九月給事中穆質請州府鹽鐵巡院應決私鹽死囚請州縣同監免有寬濫從之

四年十二月御史中丞李夷簡奏諸州使有兩稅外雜權率及違勅不法事請諸道鹽鐵轉運度支巡院察訪

狀報臺司以憑聞奏從之

五年五月度支奏郵坊邠寧涇原諸軍將士請同當處百姓例食烏白兩池鹽從之

六年閏十二月戶部侍郎判度支盧坦奏河中兩池類鹽勅文祇許于京畿鳳翔陝虢河中澤潞河南許汝等十五州界內糴貨比來因循兼越興元府及洋州興鳳文成等六州臣移牒勘責得山南西道觀察使報其果闡兩州鹽本土戶人及巴南諸郡市糴又供當軍士馬尚有懸欠若兼數州自然闕絕又得興元府諸耆老狀

唐會要 卷之五
申訴臣今商量河中鹽請放入六州界糴貨從之
十年七月度支皇甫鏘奏加陝西內四監劍南東西兩
川山南西道鹽估以利供軍從之
十三年鹽鐵使程昇奏應諸州府先請置茶鹽店收稅
伏準今年正月一日赦文具諸道州府因用兵以來或
慮有權置職名及擅加科配事非常制一切禁斷者伏
以權稅茶鹽本資財賦贍濟軍鎮蓋是從權兵罷自合
便停事久實爲重歛其諸道先所置店及收諸色錢物
等歸非擅加且異常制伏請准敕文勒停從之

十四年三月鄆青兗三州各置權鹽院
十五年閏正月鹽鐵使柳公綽奏當使諸鹽院塲官及
專知納給并吏人等有罪犯合結罪者比來推問祇罪
本犯所由其監臨主守都無科處伏請從今後舉名例
律每有官吏犯贓監臨主守同罪及不能覺察者并請
准條科處所冀貪吏革心從之
其年九月改河北稅鹽使爲權鹽使

長慶元年三月勅河朔初平人希德澤且務寬泰使之
獲安其河北權鹽法宜權停仍令度支與鎮冀魏博等

道節度審察商量如能約計謀利錢數都收管每年據數付權鹽院亦任穩便自天寶末兵興以來河北鹽法羈縻而已暨元和中用皇甫鎛奏置稅鹽院同江淮兩池權利人苦犯禁戎鎮亦頻上訴故有是命

其月鹽鐵使王播奏揚州白沙兩處納權場請依舊爲院又奏請諸鹽院糶鹽付商人請每斗加五十文通舊二百文價諸道處煎鹽場停置小舖糶鹽每斗加二十文通舊一百九十文價又奏應管煎鹽戶及鹽商并諸鹽院停場官吏所由等前後制勅除兩稅外不許差役

追擾今請更有違越者縣令奏聞貶黜刺史罰一季俸錢再犯者奏聽進止並從之

二年三月王播爲淮南節度使兼領鹽鐵轉運播請攜鹽鐵印赴鎮上都院請別給賜從之

其年五月勅兵革初寧實資權筦閭重困則可蠲除如聞淄青兗鄆三道往年糶鹽價錢近收七十萬貫軍資給費優贍有餘自鹽鐵使收管已來軍府頓絕其利遂使經行陳者有停糧之怨服隴畝者興加稅之嗟雖縣官受利而郡府益空俾人獲安寧我能節用其鹽鐵

使先于淄青兗鄆等道管內置小鋪糶鹽及巡院納權起長慶二年五月一日以後一切並停仍委薛平馬總曹華約校比年節度使自收管充軍府州縣逐急用度及均減管內貧下百姓兩稅錢數兼委節度觀察使至年終各具糶鹽所得錢并減放貧下稅數聞奏

四年五月勅東都江陵鹽鐵轉運留後並改爲知院者從鹽鐵使王涯請也

太和二年七月勅潼關以東度支分巡院宜併入鹽鐵江淮河陰留後院

開成元年閏五月七日鹽鐵使奏應犯鹽人準貞元十九年太和四年已前勅條一石已上者止於決脊杖二十徵納罰錢足於太和四年八月二十已後前鹽鐵使奏二石以上者所犯人處死其居停并將舡容載受故擔鹽等人並準犯鹽條問處分近日決殺人轉多權課不加舊今請却依貞元舊條其犯鹽一石已上至一石者請決脊杖二十補充當據捉鹽所由待捉得犯鹽人日放如犯三石已上者卽是囊橐奸人背違法禁請決訖待瘡損鋼身牒送西北邊諸州府効力仍每季多具

人數及所配去處申奏挾持軍器與所由捍敵方就擒者卽請準舊條同光火賊例處分從之

二年十月勅鹽鐵戶部度支三使下監院官皆郎官御史爲之使雖更改官不得移替如顯有曠敗卽具事以聞

五年九月勅稅茶法起來年却付鹽鐵使收管

權酤

貞元二年十二月度支奏請於京城及畿縣行權酒之法每斗權酒錢百五十文其酒戶與免雜差役從之

元和六年京兆府奏權酒錢除出正酒戶外一切隨兩稅青苗錢據貫均率從之

十二年四月戶部奏準勅文如配戶出權酒錢處卽不待更置官店權酤其中或恐諸州府先有不配戶出錢者卽須權酤請委州府長官據當處錢額約米麴時價收利應額足卽止仍限起請到後一月日內處置

十四年七月湖州刺史李應奏先是官中酤酒代百姓納權歲月旣久爲弊滋深伏望許令百姓自酤取舊額仍許入兩稅隨貫均出依舊例折納輕貨送上都許之

太和八年二月九日勅節文京邑之內本無酤權自貞元用兵之後費用稍廣始定戶店等第令其納權殊非惠民今後特宜停廢

會昌六年九月勅揚州等八道州府置權麴并置官店酤酒代百姓納權酒錢并充資助軍用各有權許限揚州陳許汴州襄州河東五處權麴浙西浙東鄂岳三處置官店酤酒如聞禁止私酤過聞嚴酷一人違犯連累數家閭里之間不免咨怨宜從今已後如有人私酤酒及置私麴者但許罪止一身并所由容縱任據罪處分

鄉井之內如不知情並不得追擾其所犯之人任用重典兼不得沒入家產

鹽池使

景雲四年三月蒲州刺史充關內鹽池使

先天二年九月強循除隴州刺史充鹽池使此池卽鹽州池也

開元十五年五月兵部尚書蕭嵩除關內鹽池使自是朔方節度常帶鹽池使也

鹽鐵使

乾元元年度支郎中第五琦充諸道鹽鐵使上元元年
五月戶部侍郎劉晏充鹽鐵使元年建子月戶部侍郎
元載充鹽鐵使廣德二年戶部侍郎第五琦充諸道鹽
鐵使永泰元年正月劉晏充東都淮南浙江東西湖南
山南東道鹽鐵使第五琦充京畿關內河東劍南山南
西道鹽鐵使大曆四年三月劉晏除吏部尚書充東都
河南江淮山南東道鹽鐵使五年三月二十六日停建
中三年十二月二十日包佶充汴東鹽鐵使崔縱充汴
西鹽鐵使貞元元年十二月尚書左僕射韓滉加諸道

鹽鐵使五年二月中書侍郎竇參充諸道鹽鐵使八年
三月戶部侍郎張滂充諸道鹽鐵使十年十月潤州刺
史王緯充諸道鹽鐵使十五年以浙西觀察使李錡充
諸道鹽鐵使永貞元年以司空平章事杜佑兼諸道鹽
鐵使元和元年四月兵部侍郎李巽充諸道鹽鐵使三
年六月刑部尚書李鄘充諸道鹽鐵使五年十二月盧
坦除刑部侍郎充諸道鹽鐵使六年四月刑部侍郎王
播充諸道鹽鐵使十四年五月刑部侍郎柳公綽充諸
道鹽鐵使長慶元年二月王播復爲刑部尚書諸道鹽

鐵使四年四月王涯除戶部侍郎充諸道鹽鐵使寶曆元年正月王播爲淮南節度又充諸道鹽鐵使太和九年十一月右僕射令狐楚充諸道鹽鐵使開成元年戶部尚書李石充諸道鹽鐵使三年十月楊嗣復爲戶部尚書充諸道鹽鐵使五年二月戶部尚書崔珙充諸道鹽鐵使會昌元年七月左僕射平章事杜悰充諸道鹽鐵使六年四月以大理卿馬植爲刑部侍郎諸道鹽鐵使大中五年刑部侍郎裴休充諸道鹽鐵使十二年兵部侍郎柳仲郢充諸道鹽鐵使十二年二月戶部侍郎

夏侯孜充諸道鹽鐵使十四年右僕射杜悰復充諸道鹽鐵使咸通五年十一月戶部侍郎劉鄴充諸道鹽鐵使六年十月兵部侍郎于琮充諸道鹽鐵使乾符元年二月崔彥昭爲兵部侍郎充諸道鹽鐵使其年又以兵部侍郎王凝充諸道鹽鐵使二年二月兵部侍郎裴坦充諸道鹽鐵使四年六月以宣歙觀察使高駢爲潤州刺史諸道鹽鐵使六年移節淮南領使如故中和元年兵部侍郎蕭遘充諸道鹽鐵使其年中書侍郎平章事韋昭度充諸道鹽鐵使光啓二年三月刑部尚書孔緯

唐會要 卷之
充諸道鹽鐵使大順二年門下侍郎杜讓能充諸道鹽
鐵使景福二年十一月吏部尚書平章事崔昭緯充諸
道鹽鐵使乾寧二年京兆尹嗣薛王知柔爲戶部尚書
充諸道鹽鐵使其年九月門下侍郎平章事徐彥若充
諸道鹽鐵使光化三年八月左僕射平章事崔允充諸
道鹽鐵使天祐元年左僕射裴樞充諸道鹽鐵使其年
門下侍郎平章事柳璨充諸道鹽鐵使

安邑解縣兩池 置權鹽使一員推官一員巡官六員
安邑院官一員解縣院官一員胥吏若干人防池官健

及池戶若干人先是兩池鹽務隸度支其職事諸道巡
院貞元十六年史牟以金部郎中主池務恥同諸院遂
奏置使額至二十一年鹽鐵度支合爲一使以杜佑兼
領佑以度支旣稱使其所管不宜更有使名遂與東渭
橋使同奏罷之至元和三年七月判度支裴均以兩池
職轉繁劇復以留後爲鹽鐵使

女鹽池 在解縣朝邑小池在同州鹵池在京兆府奉
先縣並禁斷不權

烏池 在鹽州置權稅使一員推官一員巡官兩員胥

吏一百三十八防池官健及池戶四百四十人
温池置權稅使一員推官兩員巡官兩員胥吏三十
九人防池官健及池戶百六十五戶大中四年三月因
收復河隴勅令度支收管其鹽仍差靈州分巡院官專
勾當至六年勅隸威州以新制置未立課額
胡落池近在豐州界隸河東供軍使每年採鹽一萬
四千餘石給振武天德兩軍及營田水運官健自大中
四年黨項叛擾饋運不通供軍使請權市河東白池鹽
供食其白池屬河東節度使不繫度支

長慶元年三月勅烏池每年糶鹽收權博米以一十五
萬石爲定額

太和二年三月度支奏京兆府奉先縣界鹵池側近百
姓取水栢柴燒灰煎鹽每石灰得一十二斤鹽亂法甚
於鹹土請行禁絕今後犯者據灰計鹽一如兩池鹽法
條例科斷從之

三年四月勅安邑解縣兩池權課以實錢一百萬貫爲
定額至大中元年正月勅但取正段精好不必計舊額
錢數及大中六年度支收權利一百二十一萬五千餘

賈

倉及常平倉

武德元年九月四日置社倉其月二十二日詔曰特建農圃用督耕耘思俾齊民既庶且富鍾庾之量冀同水火宜置常平監官以均天下之貨市肆騰踊則減價而出田嗇豐羨則增價而收庶使公私俱濟家給人足抑止兼并宣通擁滯至五年十二月廢常平監官

貞觀二年四月三日尚書左丞戴胄上言曰水旱凶災前聖之所不免國無九年儲蓄禮經之所明誠今喪亂

之後戶口凋殘每歲納租未實倉廩隨時出給纔供常年若有凶災將何賑恤故隋開皇立制天下之人節級輸粟多爲社倉終於文皇一代得無飢饉及大業中國用不足並貸社倉之物以充官費故至末塗無以支給今請自王公已下爰及衆庶計所墾田稼穡頃畝每至秋熟準其見苗以理勸課盡令出粟麥稻之鄉亦同此稅各納所在立爲義倉若年穀不登百姓飢饉當所州縣隨便取給則有無均平常免匱竭上曰旣爲百姓先作儲貯官爲舉掌以備凶年非朕所須橫生賦歛利

人之事深是可嘉宜下有司議立條制戶部尚書韓仲
良奏王公已下墾田畝納二升其粟麥粳稻之屬各依
土地貯之州縣以備凶年制可之令窘苦宜以葛蔓爲
之

十三年十二月十四日詔於洛相幽徐齊并秦蒲等州
置常平倉

永徽二年閏九月六日勅義倉據地收稅實是勞煩宜
令率戶出粟上下戶五石餘各有差

六年京東二市置常平倉以大雨道路不通京師米貴

顯慶二年十二月三日京常平倉置常平署官員

咸亨元年閏九月六日置河陽倉隸司農寺

三年六月十七日于洛州栢崖置敖倉容二十萬石至

開元十年九月十一日廢

開元二年九月二十五日勅天下諸州今年稍熟穀價
全賤或慮傷農常平之法行之自古宜令諸州加時價
三兩錢糴不得抑歛仍交相付領勿許懸久蠶麥時熟
穀米必貴卽令減價出糴豆等堪貯者熟亦宜準此以
時出入務在利人其常平所須錢物宜令所司支料奏

聞

四年五月二十一日詔州縣義倉本備飢年賑給近年以來每三年一度以百姓義倉糴米遠送京納仍勒百姓私出脚錢自今以後更不得以義倉變造

七年六月勅關內隴右河南河北五道及荆揚襄夔絳益彭蜀漢劍茂等州並置常平倉其本上州三千貫中州二千貫下州一千貫每糴具本利與止倉帳同申十年九月十五日廢河陽栢崖坦縣等倉

十六年十月二日勅自今歲普熟穀價至賤必恐傷農

加錢收糴以實倉廩縱逢水旱不慮阻飢公私之間或亦爲便宜令所在以常平本錢及當處物各于時價上量加三錢百姓有糴易者爲收糴事須兩和不得限數配糴訖具所用錢物及所收糴物數具申所司仍令上佐一人專勾當

二十二年八月九日勅應給貸糧本州錄奏勅到三口以下給米一石六口以下給兩石七口以下給三石如給粟準米計折

二十八年正月勅諸州水旱皆待奏報然後賑給道路

悠遠徃復淹遲宜令給訖奏聞

天寶六載三月二十二日太府少卿張瑄奏準四年五月八日并五載三月十六日勅節文至貴時賤價出糶賤時加價收糶若百姓未辦錢物者任準開元二十八年七月九日勅量事餘糶至粟麥熟時徵納臣使司商量且糶舊糶新不同別用其餘糶者至納錢日若粟麥雜種等時價甚賤恐更迴易艱辛諸加價便與折納廣德二年正月二十五日第五琦奏每州置常平倉及庫使自商量置本錢隨當處米物時價賤則加價收糶

貴則減價糶賣

建中元年七月勅夫常平者常使穀價如一大豐不爲之減大儉不爲之加雖遇災荒民無菜色自今已後忽米價貴時宜量出官米十萬石麥十萬石每日量付市行人下價糶貨

三年九月戶部侍郎趙贊上言曰伏以舊制置倉儲粟名曰常平軍興已來此事寔廢因循未齊垂三十年其間或因凶荒流散餓死相食者不可勝紀古者平準之法使萬室之邑必有萬鍾之藏春以奉耕夏以奉耘雖

唐會要 卷六 十一
有大賈富家不得豪奪吾民者蓋謂能行轉重之法也
自陛下登極以來許京城兩市置常平官糴米雖經
頻年少雨米價未騰貴此乃即日明驗實要推而廣之
當軍興之時與承平或異事須兼儲布帛以備時須臣
今商量請于兩都并江陵東都揚汴蘓洪等州府各置
常平輕重本錢上至百萬貫下至數十萬貫隨其所宜
量定多少唯置斛斗疋段絲麻等候物貴則減價出賣
物賤則加價收糴權其輕重以利疲民從之贊于是條
奏諸道津要都會之所皆置吏閱商人財貨計錢每貫

稅二十文天下所出竹木茶漆皆十一稅之以充常平
本時國用稍廣常賦不足所稅亦隨得而盡終不能爲
常平本

貞元八年十月勅諸軍鎮和糴貯備共三十三萬石本
價之外更量與優饒其粟及麥據米數準折虛價直委
度支以停減江淮運脚錢充並支綾絹緇綿勿令折估
其所糴粟等委本道節度使監軍同勾當別貯非承特
詔不得給用

十四年六月詔以米價稍貴令度支支出官米十萬石于

唐會要 卷之六
兩街賤糶其月以久旱穀貴人流出太倉粟分給京畿諸縣其年七月詔賑給京畿麥種三萬石其年九月以歲飢出太倉粟三十萬出糶其年十二月以河南府穀貴人流令以含嘉倉七萬石出糶
十五年二月以久旱歲飢出太倉粟十八萬石于諸縣賤糶

十九年十月太倉奏請依六典置太倉令兩員丞六員監事十員支計官驅使官三人典六人府史六人從之
元和元年正月制歲時有豐歉穀價有重輕將備水旱之虞在權聚歛之術應天下州府每年所稅地子數內宜十分取二分均充常平倉及義倉仍各逐穩便收貯以時糶糴務在救乏賑貸所宜速須開奏
三年八月司農少卿崔鄭奏停太倉丞二員監事二員從之

六年二月制如聞京畿之內舊穀已盡宿麥未登宜以常平義倉粟二十四萬石貸借百姓諸道州府有乏少糧種處亦委所在官長用常平義倉米借貸淮南浙西宣歙等道準元和二年四月賑貸並宜停徵容至豐年

然後徵納

九年四月詔出太倉粟七十萬石開六場糶之并賑貸外縣百姓至秋熟徵納便于外縣收貯以防水旱

十二年四月詔出粟二十五萬石分兩街降估出糶九月詔諸道應遭水州府河中澤潞河東幽州江陵府等管內及鄭滑滄景易定陳許晉熈蘇襄復台越唐隨鄧等州人戶宜令本州厚加優卹仍各以當處義倉斛斗據所損多少量事賑給訖具數聞奏其人戶中有漂溺致死者仍委所在收瘞其屋宇摧倒亦委長吏量事勸

課修葺使得安存

十三年正月戶部侍郎孟簡奏天下州府常平義倉等斛斛請準舊例減估出糶但以石數奏申有司更不收管州縣得專以利百姓從之

長慶二年十月詔江淮諸州旱損頗多所在米價不免踊貴委淮南浙西浙東宣歙江西福建等道觀察使各于本道有水旱處取常平義倉斛斛據時估減半價出糶以惠貧民

四年二月勅出太倉陳米三十萬石於兩街出糶

其年三月制曰義倉之制其來日久近歲所在盜用沒入致使小有水旱生民坐委溝壑推言其弊職此之由宜令諸州錄事叅軍專主勾當苟爲長吏迫制卽許驛表上聞考滿之日戶部差官交割如無欠負與減一選如欠少者量加一選欠數過多戶部奏聞節級科處太和四年八月勅今年秋稼似熟宜于關內七州府及鳳翔府和糴一百萬石

開成元年八月戶部奏應諸州府所置常平義倉伏請起今後通公私田畝別納粟一升逐年添置義倉歛之

至輕事必通濟歲月稍久自致充盈縱逢水旱之災永絕流亡之慮勅從之

其年十一月忠武軍節度使杜悰天平軍節度使王源中奏當道常平義倉斛斛除元額外請別置十萬石以備凶年從之

大中六年四月戶部奏請道州府收管常平義倉斛斛今後如有災荒水旱外請委所在長吏差清強官勘審如實便任開倉先從貧下不濟戶給貸訖具數分析申奏并報戶部不得妄有給與富豪人戶其斛斛仍仰本

唐書卷一百一十五
卷之三
州錄事叅軍至當年秋熟專勾當據數追收如州府安
有給使其錄事叅軍本判官請重加殿罰長吏具名申
奏勅旨宜依
其年十一月勅應畿內諸縣百姓軍戶合送納諸倉及
諸使兩稅送納斛斗舊例每斗函頭耗物遽除皆有數
限訪聞近日諸倉所由分外邀額利索耗物致使京畿
諸縣轉更凋弊農桑無利職此之由自今以後祇令依
官額餘並禁斷

雜錄

長安元年十一月十三日勅負債出舉不得迴利作本
并法外生利仍令州縣嚴加禁斷

開元十五年七月二十七日勅應天下諸州縣官寄附
部人興易及部內放債等並宜禁斷

十六年二月十六日詔比來公私舉放取利頗深有損
貧下事須釐革自今已後天下負舉祇宜四分收利官
本五分取利

二十年九月二十九日勅綾羅絹布雜貨等交易皆合
通用如聞市肆必須見錢深非通理自今後與錢貨兼

用違者準法罪之

元和五年十一月勅應中外官有子弟凶惡不告家長私舉公私錢無尊長同署文契者其舉錢主并保人各決二十仍均攤貨納應諸色買賣相當後勒買人面付賣人價錢如違牙人重杖二十京兆尹王播所奏也寶曆元年正月七日勅節文應京城內有私債經十年已上曾出利過本兩倍本部主及元保人死亡並無家產者宜令臺府勿爲徵理

唐會要卷八十九

宋

王

溥

撰

疏鑿利人

武德元年長孫操除陝東道行臺金部郎中遂自陝東引水入城以代井汲百姓賴之

七年四月九日同州治中雲得臣開渠自龍門引黃河溉田六千餘頃

貞觀十一年揚州大都督府長史李襲譽以江都俗好商賈不事農業譽乃引雷陂水又築勾城塘溉田八百

餘頃百姓獲其利

大曆四年五月十五日勅涇堰監先廢宜令却置

十二年京兆尹黎幹開決鄭白二水支渠及稻田磴碾復秦漢水導以溉陸田

建中元年四月宰相楊炎不習邊事請于豐州置屯田發關輔民開陵陽渠人頗苦之京兆尹嚴郢常從事朔方曉其利害乃奏五城舊屯及兵募倉儲等數奏曰按舊屯沃饒之地今十不畊一若力可墾闢不俟浚渠具諸屯水利可種之田甚廣蓋功力不及因致荒廢今若

發兩京關輔民于豐州浚渠營田徒擾兆庶必無其利臣不敢遠引他事請以內園植稻明之其秦地膏腴田稱第一其內園丁皆京兆人于當處營田月一替其易可見然每人月給錢八千糧食在外內園丁猶僦募不占奏令府司集事計一丁一歲當錢九百六十米七斛二斛計所僦丁三百每歲合給錢二萬八千八百貫米二千一百六十斛不知歲終收穫幾何臣計所得不補所費況二千餘里發人出屯田一歲方替其糧穀從太原轉餉漕運價值至多又每歲人須給錢六百三十米

七斛二斗私出資費數又倍之據其所收必不登本而關輔之民不免流散是虛擾畿甸而無益軍儲與天寶以前屯田事殊臣至愚不敢不熟計惟當省察疏奏不報到又上奏曰伏以五城舊屯其數至廣臣前挾名聞奏訖其五城軍士若以今日所運開渠之糧貸諸城官田至冬輸之又以所送開渠功直布帛先給田者至冬令據時估輸穀如此則關輔免于徵發五城豐厚力農闢田比之浚渠十倍利也郵奏不省卒開陵陽渠而竟棄之

貞元四年六月二十六日涇陽縣三白渠限口京兆尹鄭叔則奏六縣分水之處實爲要害請準諸堰例置監及丁夫守當勅旨依

八年三月嗣曹王舉爲荆南節度使觀察先是江陵東北七十里廢田旁漢古堤壞決凡二處每夏則爲浸溢臯使命塞之廣良田五千頃畝收一鍾又規江南廢洲爲廬舍架江爲二橋流人自占者二千餘戶自荆至樂鄉凡二百餘里旅舍鄉聚凡十數大者皆數百家楚俗佻薄舊不鑿井悉飲敗澤乃令合錢鑿井人以爲便

十三年七月詔曰昆明池附近都城蒲魚所產宜令京兆尹韓臯充使修堰

十六年十一月以東渭橋納給使徐班兼白渠漕渠及昇原城國等渠堰使

元和八年孟簡爲常州刺史開漕古孟瀆長四十里得沃壤四千餘頃觀察使舉其課遂就賜金紫焉

其年四月以神策軍士修城南之浚渠

其年十二月魏博觀察使田宏正奏準詔開衛州黎陽縣古黃河道從鄭滑節度使薛平之請也先是滑州多

水災其城西去黃河二里每夏漲溢則浸壞城郭水及羊馬城之半平詢諸將更得古河道於衛州黎陽縣界遣從事裴宏泰以水患告於宏正請開古河用分水力宏正遂與平皆上聞詔許之乃於鄭滑兩郡徵徒萬人鑿古河南北長十四里東西闊六十步深一丈七尺決舊河以注新河遂無水患詔並褒美焉

十三年湖州刺史于頔復長城縣方山之西湖西湖南朝疏鑿溉田三十頃歲久堰廢至是復之杭稻蒲魚之利賴以濟

長慶二年溫造爲朗州刺史奏開復鄉渠九十七里溉田二千頃郡人利之名爲右史渠至太和五年七月造復爲河陽節度使奏浚懷州古渠枋口堰役功四萬溉濟源河內溫武陟四縣田五千頃

四年七月詔疏靈州特進渠置營田六百頃

大曆二年二月以詔應令劉仁師充修渠堰副使初仁師爲高陵令上言三白渠可利者遠而涇陽獨有之條理上聞其弊遂革關中大賴焉

其年三月內出水車樣令京兆府造水車散給沿鄭白

渠百姓以溉水田

磴碾

開元九年正月京兆少尹李元紘奏疏三輔諸渠王公之家緣渠立磴以害水功一切毀之百姓大獲其利至廣德二年三月戶部侍郎李栖筠刑部侍郎王翊充京兆少尹崔昭奏請拆京城北白渠上王公寺觀磴碾七十餘所以廣水田之利計歲收粳稻三百萬石

大曆十三年正月四日奏三白渠下碾有妨合廢拆總四十四所自今以後如更置卽宜錄奏

其年正月壞京畿白渠八十餘所先是黎幹奏以鄭白
支渠磴碾擁隔水利人不得灌溉請皆毀廢從之時昇
平公主上之愛女有磴兩輪乞留上曰吾爲蒼生爾識
吾意可爲衆率先遂卽日毀之

元和六年正月京城諸僧有請以莊磴免稅者宰臣李
吉甫奏曰錢米所徵素有定額寬緇徒有餘之力配貧
下無告之耻必不可許從之

八年十二月勅應賜王公郡主並諸色莊宅磴碾等並
任典貼貨賣其率稅夫役委府縣收管

泉貨

武德四年七月十日廢五銖錢行開元通寶錢徑八分
重二銖四綮十文重一兩一千文重六斤四兩以輕重
大小最爲折衷遠近甚便之其錢文給事中歐陽詢製
詞及書時稱其工其字含八分及篆隸三體其詞先上
後下次左後右讀之自上及左迴環讀之其義亦通流
俗謂之開元通寶錢鄭虔會粹云詢初進螭樣自文德
皇后指一甲跡故錢上有指文十八日置錢監於洛并
幽益等諸州秦王齊王賜三鑪鑄錢裴寂賜一鑪敢有

唐會要 卷之六
盜鑄者身死家口籍沒至五年三月二十四日桂州置
錢監

顯慶五年九月以天下惡錢多令官私以五惡錢酬一
好錢贖取至十月以好錢一文博惡錢兩文至儀鳳四
年四月以天下惡錢甚多令東都出遠年糙米及粟就
市糶斗別納惡錢白文其惡錢令少府司農相知卽令
鑄破其厚重徑合斤兩者任將行用至先天元年九月
二十七日京中用錢惡貨物踴貴諫議大夫楊虛受上
疏曰伏見市井用錢不勝濫惡有加鐵錫卽非公鑄虧

損正道惑亂平民銅錫亂雜僞錢豐多正刑漸失於科
條明罰未加於守長帝京三市人雜五方淫巧競馳後
僞成俗至於商賈積滯富豪藏鏹兼并之人歲增儲蓄
貧素之士日有空虛公錢未益於時須禁法不當於世
要其惡錢臣望官爲博取納鑄錢州京城並以好錢爲
用書奏付中書門下詳議以爲擾政不行至開元六年
正月十八日勅禁斷惡錢行三銖四綮已上舊錢更收
人間惡錢鎔破復鑄準樣式錢勅禁出之後百姓喧然
物價搖動商人不甘交易宰相宋璟蘇頲奏請出太府

錢五萬貫分於南北兩京平價買百姓間所賣之物堪貯掌官須者庶得好錢散行人間從之又降勅近斷惡錢恐人少錢行用其兩京文武官夏季防閣庶僕宜卽先給錢待後季任取所配物貨賣準數還官

七年二月詔天下惡錢並令禁斷錢令初下或恐艱辛宜量出米十萬石令府縣及太府寺選交易穩便處所分置依時價糶與百姓收取惡錢便送少府監銷碎

乾封元年五月二十三日盜鑄轉多遂改鑄新文曰乾封泉寶錢徑寸重二銖六分其開元通寶必舊錢並行

用其新錢一文當舊錢之十周年之後舊錢並廢其後悟錢文之誤米帛增價乃議却用舊錢至二年正月二十九日詔比以偽濫斯起所以採乾封之號改鑄新錢靜而思之將爲未可高祖撥亂反正爰創軌模太宗立極承天無所改作今廢舊造新恐乖先旨其開元通寶宜依舊施行爲萬世法乾封新鑄錢令所司貯納更不須鑄仍令天下置鑄之處並鑄開元通寶錢至乾元元年七月十六日詔錢貨之興其來久矣蓋代有沿革時爲重輕周興九府實啓流泉之利漢造五銖亦宏改鑄

之法必令大小兼適母子相權事有益於公私理宜循於通變但以干戈未息帑藏猶虛卜式獻軍之誠宏羊興國之算靜言立法諒在便民御史中丞第五琦奏請改錢以一當十別爲新鑄不廢舊錢冀實三官之資用收十倍之利所爲於民不擾從古有經宜聽於諸監別鑄一當十錢其文曰乾元重寶而重其輪以別之一當五十以二十斤成貫仍令鑄錢使卽勾當起鑄至三年十二月詔頃屬權臣變法非良遂使貨物相沿穀帛騰踴求之輿議弊實由斯今欲仍從舊貫漸罷新錢又慮

權行轉資艱急如或猶循所務未塞其源實恐物價虛騰黎元失業靜言體要用藉良圖宜令文武百官九品以上並於尚書省集議委中書門下詳議聞奏至上元元年六月七日詔其重稜五十價錢宜減作三十文行用其開元舊錢宜一錢十文行用乾元當十錢宜依前行用仍令京中及畿縣內依此處分諸州待後進止至七月二十五日勅先造重稜五十價錢先令畿內減三十價行其天下諸州並宜準此至十二月二十九日詔應典貼莊宅店舖田地禮碾等先爲實錢典貼者令還

唐會要 卷之九
以實錢價先以虛錢典貼者令以虛錢贖其餘交關並依前用當十錢由是錢有虛實之稱至寶應元年五月十九日赦文集開元乾元重稜錢並宜準一文用不須計以虛數

開元二十二年三月二十一日敕布帛不可以尺寸爲交易菽粟不可以秒忽買有無古之爲錢以通貨幣豈無變通往者漢文之時已有放鑄之令雖見非於賈誼亦無費於賢君古往今來時移事異亦欲不禁私鑄其理如何公卿百寮詳議可否秘書監崔沔議曰夫國之

有錢時所通用若許私鑄人必競爲各徇所求小如有利漸忘本業大計斯貧是以賈生之陳七福規于更漢令太公之創九府將以殷貧人况依法則不成違法則有利謹按漢書文帝雖除盜鑄錢令而不得雜以鉛鐵爲他巧者然則雖許私鑄不容奸錢錢不容奸則鑄者無利鑄者無利則私鑄自息斯則除之與不除爲法正等能謹于法而節其用則令行而詐不起事變而奸不生斯所以稱賢君也今若聽其私鑄嚴斷惡錢官必得人人皆知禁誡則漢政可侔猶恐未若皇唐之舊也今

若稅銅折役則官治可成計估度庸則私錢無利易而
可久簡而難誣謹守舊章無越制度且錢之爲物貴以
通貨利不在多何待私鑄然後足用也左監門錄事參
軍劉秩議曰古者以珠玉爲上幣黃金爲中幣刀布爲
下幣管子曰夫三幣握之則非有補于煖也捨之則非
有損于飽也先王以守財物以御人事而平天下也是
以命之曰衡衡者使物一高一下不得有常故與之在
君奪之在君是以民戴君如日月親君如父母用此術
也是爲人主之權今之錢卽古之下幣也陛下若捨之

任人則上無以御下下無以事上其不可一也夫物重
則傷農錢輕則傷賈故善爲國者觀物之貴賤錢之輕
重大物重則錢輕錢輕由乎物多多則作法收之使少
少則錢重重則作法布之使輕輕重之本必由乎是奈
何而假於人其不可二也夫鑄錢不雜以鉛鐵則無利
雜以鉛鐵則惡不重禁不足以懲惡方令塞其私鑄之
路人猶冒死以犯之况啓其源而欲人之從令乎是設
陷穽而誘之入其不可三也夫許人鑄錢無利則人不
鑄有利則人去南畝者衆去南畝者衆則草萊不墾草

唐會要卷之三
三
萊不墾又鄰於寒餒其不可四也夫人富溢則不可以
賞勸貧餒則不可以威禁故法令不行民之不治皆由
貧富之不齊也若許其鑄錢則貧者必不能爲臣恐貧
者彌貧而服役於富室富室乘之則益恣昔漢文之時
吳濞諸侯也富埒天子鄧通大夫也財侔王者此皆鑄
錢所致也必欲許其私鑄是與人利權而捨其柄其不
可五也陛下必以錢重而傷本工費而利寡則臣願言
其失以效愚計夫錢重者猶人鑄日滋於前而爐不加
於舊又公錢重與銅之價頗等故盜鑄者破重錢爲輕

錢禁寬則行禁嚴則止止則棄矣此錢之所以少也夫
鑄錢用不贍者在乎銅貴銅貴之由在於採用者衆矣
夫銅以爲兵則不如鐵以爲器則不如錫禁之無害陛
下何不禁於人禁於人則銅無所用銅無所用則銅益
賤銅賤則錢之用給矣夫銅不布下則盜鑄者無因而
鑄無因而鑄則公錢不破公錢不破則人不犯死刑錢
又日增不復利矣是一舉而四善兼也伏惟陛下熟察
之

其年十月六日勅貨物兼通將以利用而布帛爲本錢

刀是未賤本貴未爲弊則深法教之間宜有變革自今已後所有莊宅以馬交易並先用絹布綾羅絲綿等其餘市價至一千以上亦令錢物兼用違者科罪

二十六年於宣潤等州置錢監

乾元元年七月戶部侍郎第五琦以國用未足幣重貨輕乃先鑄乾元重寶錢以一當十用行之及作相請更鑄重輪乾元錢以一當五十與乾元開元寶錢三品並行既而物價騰貴餓迫死亡枕籍道路又盜鑄爭起中外皆以爲琦變法之弊封聞奏曰遂貶忠州長史

建中元年九月戶部侍郎韓洄上言江淮錢監歲出錢四萬五千貫輸於京師度工用轉送之費每貫計錢二千是本倍利也今商州紅崖冶出銅益多又有洛源監久廢不治請增工鑿山以取銅洛源故監置十鑪鑄之歲計出錢七萬二千貫度工用轉送之費貫計錢九百則利浮本矣其江淮七監請皆停罷從之

二年八月諸道鹽鐵使包佶奏江淮百姓近日市肆交易錢交下粗惡揀擇納官者三分纔有一分餘並鉛錫銅盪不敷斤兩致使緝價騰貴惡錢漸多訪聞諸州山

野地窖皆有私錢轉相貨易奸濫漸深今委本道觀察使明立賞罰切加禁斷

四年六月判度支侍郎趙贊以常賦不足用乃請採連州白銅鑄大錢以一當十權其輕重

貞元九年正月張滂奏諸州府公私諸色鑄造銅器雜物等伏以國家錢少損失多門興販之徒潛將銷鑄每銷錢一千爲銅六斤造寫雜物器物則斤直六千餘其利旣厚銷鑄遂多江淮之間錢實減耗伏請準從前勅文除鑄鏡外一切禁斷

十年六月勅今後天下鑄造買賣銅器並不須禁止其器物約每斤價值不得過一百六十文委所在長吏及巡院同勾當訪察如有銷錢爲銅以盜鑄錢罪論

十四年十二月鹽鐵使李若初奏請諸道州府多以近日泉貨數少繒帛價輕禁止見錢不令出界致使課利有缺商賈不通請指揮見錢任其往來勿使禁止從之元和元年二月以錢少禁用銅器

二年二月詔曰錢貴物賤傷農害工權其輕重須有通變比者鉛錫無禁鼓鑄有妨其江淮諸州府收市鉛銅

等先已令諸道知院官勾當緣令初出未谷頒行宜委諸道觀察使等與知院官專切當事畢日仍委鹽鐵使據所得數類會聞奏四月禁鉛錫錢

三年五月鹽鐵使李巽上言得湖南院申郴州平陽高亭兩縣界有平陽冶及馬跡曲木等古銅坑約二百八十餘井差官檢覆實有銅錫今請郴州舊桂陽監置鑪兩所採銅鑄錢每日約二十貫計一年鑄成七千貫有益於民從之

其年六月詔曰泉貨之法義在通流若錢有所壅貨當益賤故藏錢者得乘人之急居貨者必損己之資今欲着錢令以出滯藏加鼓鑄以資流布使商旅知禁農桑獲安義切救時情非欲利若革之無漸恐人或相驚應天下商賈先蓄見錢者委所在長吏令收市貨物官中不得輒有程限逼迫商人任其貨易以求便利計周歲之後此法通行朕當別立新規設蓄錢之禁所以先有告示許其方圓意在他時行法不貸又天下有銀之山必有銅鑛銅者可資於鼓鑄銀者無益於生民權其重輕使務專一天下自五嶺以北見採銀坑並宜禁斷恐

所在坑戶不免失業各委本州府長吏勸課令其採銅助官中鑄作仍委鹽鐵使作法條流聞奏

四年閏三月京城時用錢每貫頭除二十文陌內欠錢及有鉛錫錢准貞元九年三月二十六日勅陌內欠錢法當禁斷慮因捉搦或亦生奸使人易從切於不擾自今以後有因交關用欠陌錢者宜但令本行頭及居停主人牙人等檢察送官如有容隱兼許賣物領錢人糾告其行頭主人牙人重加科罪府縣所由祇承人等並不須干擾若非因買賣自將錢於街衢行者一切勿問

其年六月勅五嶺已北所有銀坑依前任百姓開採禁見錢出嶺

六年二月制公私交易十貫錢已上卽須兼用疋段委度支鹽鐵使及京兆尹卽具作分數條流聞奏茶商等公私使換見錢並須禁斷

其年三月河東節度使王鐔奏請於當管蔚州界加置鑪鑄銅錢廢管內錫錢詔許之仍令加至五爐

七年五月兵部尚書判戶部事王紹戶部侍郎判度支盧坦鹽鐵使王播等奏伏以京都時用多重見錢官中

支計近日殊少蓋緣比來不許商人使換因茲家有滯藏所以物價轉輕錢多不出臣等今商量伏請許令商人于戶部度支鹽鐵三司任便換見錢一切依舊禁約伏以比來諸司諸使等或有使商人錢多留城中逐時收貯積藏私室無復流通伏請自今以後嚴加禁約從之

八年四月勅以錢重貨輕出內庫錢五十萬貫令兩常平收市布帛每疋段估加十之一

十一年九月勅今後應內外支用錢宜每貫除墊一陌外量抽五十文仍委本道本司本使據數逐季收計具諸道錢便差綱部送度支收管以備軍需時以淮西用兵從有司之請也

十二年正月勅泉貨之設古有常規將使重輕得宜是資歛散有節必通其變以利於人今繒帛轉賤公私俱弊宜出見錢五十萬貫令京兆府揀擇要便處開場依市價交易選擇清強官吏專切勾當仍各委本司先作處置條件聞奏必使事堪經久法可通行又勅近日布帛轉輕見錢漸少皆緣所在擁塞不得通流宜令京城

內自文武官寮不問品秩高下並公郡縣主中使等已下至士庶商旅等寺觀坊市所有私貯見錢並不得過五十貫如有過此許從敕出後限一月內任將別物收貯如錢數校多處置未了其任便於限內於地界州縣陳狀更請限縱有此色亦不得過兩月若一家內別有宅舍店舖等所貯錢並須計同此數其兄弟本來異居曾經分析者不在此限如限滿後有誤犯者白身人等宜付所司痛杖一頓處死其文武官及公主等並委有司聞奏當重科貶戚屬中使亦具名銜聞奏其贖貯錢

不限多少並勒納官數內五分取一分充賞錢數其賞錢止於五千貫此外察獲及有人論告亦重科處並量給告者時京師里閭區肆所積多方鎮錢如王鏐韓宏李惟簡少者不下五十萬貫於是競買第屋以變其錢多者竟里巷備儼以歸其直而高賈大買者多依倚左右軍官錢爲名府縣不得窮驗法竟不行

十四年六月勅應屬諸軍諸使更有犯時用錢每貫除二十文足陌內欠錢及有鉛錫錢者宜令京兆府枷項收禁牒報本軍本使府司差人就軍及看決二十如情

狀難容復有違拒者仍令府司聞奏
十五年八月中書門下奏伏準羣官所議鑄錢或請收
市民間銅物令州郡鑄錢當開元以前鹽鐵使未置亦
令州郡勾當鑄造今若兩稅納正段或慮兼要通用見
錢欲令諸道公私銅器各納所在節度團練防禦經畧
使便據元勅給與價直並折兩稅仍令本處軍民鎔鑄
其鑄本請以留州留使年支未用物充所鑄錢便充軍
府州縣公用當處軍人自有糧賜亦核省本所資衆力
並收衆銅天下併功速濟時用待一年後鑄器物盡則

停其州府有出銅鉛可以開爐鑄處具申有司便令同
諸監冶例每年與本充鑄其收市銅器期限並禁鑄造
買賣銅物等待議定便令有司條流聞奏其上都鑄錢
及收銅器請各處分將欲行尚資周慮請令中書門下
兩省尚書省御史臺並諸司長官商量重議聞奏從之
寶曆元年八月勅令銷鑄見錢爲佛像者同盜鑄錢論
長慶元年九月勅泉貨之義所貴流通如聞比來用錢
所在除陌不一與其禁人之必犯未若從俗之所宜交
易往來務令可守其内外公私給用錢從今以後宜每

唐會要 卷之九
貫一例除墊八十以九百二十文成貫不得更有加除
及陌內少欠

太和三年六月中書門下奏準元和四年閏三月勅應
有鉛錫錢並合納官如有人糾得一錢賞百錢者當時
勅條貴在峻切今詳事實必不可行祇如告一錢賞百
錢則有告一百貫錫錢須賞一萬貫銅錢執此而行事
無畔際昨因任清等犯罪施行不得遂叅酌事理量情
科賞或恐已後民間更有犯者宜立節文令可遵守臣
等商量自今已後有用鉛錫錢交易者一貫已下以州

府常行杖決脊杖二十十貫以下決六十徒三年過十
貫以上所在集衆決殺其受鉛錫錢交易者亦準此處
分其所用鉛錫錢仍納官其能糾告者每貫賞錢五千
文不滿一貫準此例累賞至於三百千仍且取當處官
錢給付其所犯人罪不至死者徵納家資充填賞錢其
元和四年閏三月勅便望刪去可之

四年十一月勅應私貯見錢家除合貯數外一萬貫至
十萬貫限一周年內處置畢十萬貫至二十萬貫以下
者限二周年內處置畢如有不守期限安然蓄積過本

限卽在人糾告及所由覺察其所犯家錢並準元和十二年勅納官據數五分取一分充賞糾告人賞錢數止於五千貫應犯錢法人色目決斷科貶並準元和十二年勅處分其所由覺察亦量賞一半事竟不行

五年二月鹽鐵使奏湖南管内諸州百姓私鑄造到錢伏緣衡道數州連接嶺南山洞深邃百姓依模監司錢樣競鑄造到脆劣奸錢轉將賤價博易與好錢相和行用其江西鄂岳桂管嶺南等道應有出銅錫之處亦慮私鑄濫錢並請委本道觀察使條流禁絕敕旨宜依

會昌六年二月勅緣諸道鼓鑄佛像鐘磬等新錢已有次第須令舊錢流布絹價稍增文武百寮俸料宜起三月一日並給見錢其一半先給虛估疋段對估價支給勅比緣錢重幣輕生民坐困今加鼓鑄必在流行通變救時莫切於此宜申先甲之令以戒居貨之徒京城及諸道起今年十月以後公私行用並取新錢其舊錢權停三數年如有違犯同用鉛錫惡錢例科斷其舊錢並納官事竟不行

天祐二年四月勅準向來事例每貫拙除外以八白五

十文爲買每陌八十五文如聞坊市之中多以八十爲陌更有除折今後委河南府指揮市肆交易並須以八十五文爲陌不得更有改移



